



Tir Yimyim

www.tiryimyim.in

Regd. No. RNI. NAGAAO/ 2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



tiryimyim@aolima



tir yimyim

TAPAK 8

COP28 senden nung PM Modi-i
UN Secy-General, Guterres ajuru

Northeast Invitational Badminton
Tournament Dec 12-15 tashi Mkg nung asayatsü



VOL. XXI NO. 55 (ADOK 55) DIMAPUR

KÜPTOKNU (SATURDAY)

LUCHII (DECEMBER) 02, 2023

₹ 5.00

61buba Statehood Day nung Naga yimten latettsü aser Naga nunger longjemtsü ayongzüker

Kohima, December 1, 2023

(TYO): Nagaland state ngur küm 6 buba ajungba anogomung nung Chief Minister Neiphiu Rio-i Naga yimten latettsü aser Naga nunger longjemtsü temepishiba agütsügo.

State Civil Secretariat Plaza nung Statehood Day benjung amongdang “asen Statehood ngur küm 60 ajungba benjungdang asenoki tang tashi aruba meyipa reprangshidi” ta CM Rio-i ashi.

“Nagaland state ngur küm 60 tashi arudang tayongzükba aser takok jenti ajurua aruogo. Asenoki tetsükdaktsü aser timtem balala ajuruba ajanga asenok tali tashitaitba aküm aser asen state tashi taitba, shisa takaba aser telongjemba kümogo” ta pai ashi.

Asenoki iba senmang bener tejakleni aotsü aser sensotemi Nagaland state keta asentsü aser nüma atangtsü, ta CM Rio-i ashi.

“Asenok terenlok aser tejakleni aoba lenmang nung jajaba mapang onoki Naga Political Issue (NPI) timi latettsüba nung temulung agütsür kechiyong iba ya asen nübertemi mapang talangka nungi aginüa arur. Ozü sorkari NPI latettsüba nung yariteptsü” ta paisa ashi.

“Naga Political Groups, India sorkar aser sendaktepa alirtemi

mangattep angatetteper tekara ba nung Naga yimten latettsü ayongzüker” ta CM Rio-i ashi.

ENPO: Timtem balala ajanga Nagaland kübok Eastern Nagaland region-i tanga tesemtem memenep lir. 2003 küm state sorkari Eastern Nagaland aser tanga tesem kar nung tangar memenepba khurettem reprangshima inyaktsü atema DUDA Department tentet, ta Rio-i ashi.

Testüba küm 20 tsüngda Centre aser State sorkar temi Nagaland kübok backward regions renloksü atema akokba tashi inyaka aruogo, ta paisa ashi.

PM DeVINE kübok Eastern Nagaland atema Rs 180 crore special development package ka ajanga mapa inyakdar aser iba mesükba mapatongtem maneni nüngdaker, ta CM Rio-i ashi.

Paisa Naga nunger tsüngda olemtip aser tangattep ajanga tebilemtsü onüktem angatetteptsü ayongzük.

MEDICAL COLLEGE: Asenok State ngur küm 60 ajungba mapang Nagaland nung mezüngbuba Medical College lapokoga ta paisa ashi.

“Kohima nung Nagaland Institute of Medical Sciences & Research (NIMSR) lapokba ya Nagaland atema kanga dang

tongtipang mapa ka lir aser onoki college ulushitsü atema sentongtem renemdar” ta Rio-is metedaktsü.

EDUCATION: State sorkari education sector nung mapa tasen aser tongtipang ka tenzükba World Bank-i teyari agütsüba NECTAR project lir. Iba mapatong kübok Department of School Education (DoSE)-i Education Management Information System (EMIS) tenzükogo, ta Rio-i ashi.

Iba ajanga Teacher Attendance Monitoring System (TAMS) tenzükogo aser sorkarisa Government Secondary aser Higher Secondary School aika nung Vocational Education mapa inyaker, ta pai ashi.

Tribal Affairs Department kübok Eklavya Model Residential School (EMRS) 3 lapokoga aser ano 11 tang teyangludak lir ta Rio-i ashi.

URBAN SECTOR: Kohima Smart City Development Project kübok Kohima yimi melenshidar aser old MLA Hostel site o Khuociezhie, Kohima nung City Centre kobi melii lapoktsü ta Rio-i ashi.

Nagaland urban administration nung kanga dang tongtipang mapa rongnung kaji Nagaland Municipal Act, 2023 agizükba lir. Iba asoshi asen kin hohotem aser teloktem nem tenüngsang agütsü tim ta Nagaland CM-isa ashi.

Testüba küm 5 shi ka tsüngda sorkari Nagaland nung gari lenmang kilometre 2,500 shi

yangluogo aser iba ya State PWD aser tanga Central agencies küleme yaritepa yangluba lir, ta paisa ashi.

“Power sector tsütsü Tsitrongse, Dimapur nung 220/132/33kV Sub-station ka yanglutsü tenzükogo. Iba atema PM-DeVINE kübok Ministry of DoNER ajanga Rs 132.37 crore lenzüktsügo. Ano, Rs 24.46 crore endoka 132/66/33kV Nagarjan Substation, Dimapur upgrade asütsü shidanga lir” ta CM Rio-i ashi.

Maneni, Department of Industries and Commerce-ia PMGati Shakti framework atema maparen inyakdar, ta paisa shisem.

AGRICULTURE: “Nagaland nung nütsüng yongsük 70% shi ka aluyimba den sendaktepa lir aser iba atema state sorkari agriculture sector nung technology tasen amshitsü meranger. Onoki aluyimertem Artificial Intelligence & Drones amala amshia tajangzük ngudaktsütsü meranger” ta CM Rio-i ashi.

Taküm Department of Horticulture-i Mission for Integrated Development of Horticulture (MIDH) kübok district 16 nung ‘One Crop One Village’ scheme inyaktsü lemitetogo, ta paisa ashi.

Sorkarisa lanurtem asoshi Kohima nung Bloom Bazaar lapokoga aser Tourism Taxi Promotion Scheme tenzükogo ta paisa shisem.

IBM Skill Build Program,

Unnati Skill Centre, UNXT programs aser Entrepreneurship Development Centres den yaritepa sorkari lanur meyirjang aika yaritsü sentong lir ta CM Rio-i metedaktsü.

DRUGS: Nagaland Police aser sendaktepa aliba Department temi ‘War on Drugs’ tenzükogo. Iba atema district ajak nung Anti-Narcotics Task Force tentetogo aser iba mapa nung arogo aser Civil Society Organizations ajaki yariteptsü ayongzüker ta CM Rio-i ashi.

Police Department-isa Movement Against Drugs & Extortion in Nagaland (MADEIN) app ka sayaogo, ta paisa shisem.

NSSB: Nagaland nung Group C posts ajaki nung nübo timi anioptsü atema state sorkari Nagaland Staff Selection Board (NSSB) tenteta mapa tenzükogo.

NSSB-i Combined Staff Recruitment Exam ajanga State department 45 nung nisung 587 aniokogo aser ano clerical & Allied services atema recruitment mapa inyaktsü ta Rio-i ashi.

Tanü iba sentong nung CM Rio-i Nagaland School Safety Digital Training aser Nagaland Disaster Reduction Road Map kaket sayatsü. Anaprong ya Nagaland State Disaster Management Authority ajanga adokba lir.

Paisa Directorate of Information & Public Relations ajanga acha-ayanga lapokba ‘60 years of Nagaland’ photo exhibition lapoktsü.

Mizoram atema Vote Counting Day melenshiogo

Aizawl, December 1, 2023

(Agencies): Election Commission of India (ECI)-i Mizoram Assembly elections indang votes azüngtsüba anogo melenshiogo.

Mezungbo ECI-i December 3 nü votes azüngtsü sangdonga liasü saka Mizoram NGO Coordination Committee (NGOCC)-i anir Deobarnü votes mazüngtsüla ta noktakba ajanga December 4 nung ang azüngtsü anogo melenogo.

Mizoram nung temeshi anogo Deobarnü votes mazüngtsüla ta telok balalai parnok dangi shiditem züluba nung ajemdaker anogo melenshir ta Election Commission-i metedaktsügo.

Taoba ita Mizoram, Rajasthan, Madhya Pradesh, Chhattisgarh aser Telangana nung assembly elections agia liasü.

Mizoram nung assembly menden 40 lir aser majority mark ji 21 lir. Tanüngba state tem nungbo December 3 nü votes azüngtsü.

Mizoram nung Lalduhoma-i aniba Zoram People's Movement (ZPM) aser Zoramthanga-i Mizo

National Front (MNF) tsüngda kanga sashia tokteptsü imlar.

ZPM ya Chief Minister Zoramthanga-i aniba sorkar den tokteptsü atema party 6 lokteper tentetba lir.

Ajisüaka Chief Minister Zoramthanga-ibo Mizoram nung hung assembly masütsü aser parnoki sorkar akümtsü ta shiogo.

NDTV Poll of Polls ajanga ZPM-i menden 17 aser MNF-i menden 14 nung takok angutsü akok ta asadangtetba osangtem metedaktsügo.

Mizoram nung Congress-ia menden 7 nung takok angutsü aser sorkar akümba nung parnoki tongti shilem agütsü akok ta asadangtetba osangtem lir.

Külen, Mizoram atema exit polls ajaki BJP-i menden 2 tashi nung dang takok angutsü ta asadangtetba shiogo.

Mizoram atema exit polls aikati hung Assembly asütsü kechiyong taoba election nung menden 27 nung takok angur MNF-i tanbo iba nungi menden tesadang ka danga mangutsü ta ashir.

Hornbill Festival 2023 aser parnok ajak pelashishia agizüker. Onokisa Partner State Assam pelashishia agizüker” ta CM Rio-i ashi.

Benjung lapokba sentong nung Konyak nunger tebur chanu 47-i sobaliba subotsü agir Naga Naga süngkong atem aser idangji taintemi injang khatoka ola agütsü.

Kukegwo Village nungi Pochury nunger Monte Chupa-i tribal guest ama sobaliba temoatsü meshi aser Kohima Bishop Most Rev. Dr. James Thoppil-i temoatsü meshia sarasadem.

Taküm benjungmong nung Germany, Colombia aser USA ajanga foreign partners ama yariteper aser parnoki par sobaliba dak sendakba teloktem anir arua lir. Külen Assam-ia state partner ka ama rock band ka anir arua lir.

Hornbill Festival 2023 aser parnok ajak pelashishia agizüker. Onokisa Partner State Assam pelashishia agizüker” ta CM Rio-i ashi.

“Iba benjung ajanga Nagaland tobur ajung sayuba dang masü saka Nagaland-i alima den sendaktepa apute yanglutsü” ta paisa ashi.

Taküm Hornbill Festival nung America, Germany, Colombia, South Korea aser linük kübok tesem balala nungi music bands aser cultural ambassadors ajanga shilem balala agütsü ta CM Rio-i metedaktsü.

Nüntugu Hornbill Music Festival nung alima tesem balala nungi musician 800 temai shilem agütsü, ta paisa shisem.

Honibar nungi anepdang aser nikongdang cultural extravaganza alitsü aser ibaji December 10 nikongdang tembangtsü.

24TH Hornbill Festival 2023

DAY 2

MORNING - 10:00 AM

HOST: SHRI. T.R. ZELIANG, DY CHIEF MINISTER, PLANNING & TRANSFORMATION, NATIONAL HIGHWAY

CO-HOST: SHRI. TOVIHOTO AYEMI, ADVISOR, TRIBAL AFFAIRS SELECTION

CO-HOST: SHRI. A. PONGSHI PHOM, MLA

CHIEF GUEST: HE DR. VICTOR ECHEVERRI JARAMILLO, AMBASSADOR OF COLOMBIA TO INDIA

HONoured GUESTS:

- I. AIR MARSHALL SP DHARKAR, COMMANDING IN CHIEF, EASTERN AIR COMMAND
- II. MS. ISABELLE TSCHAN, DEPUTY RESIDENT REP, UNDP
- III. MS. DEBASHREE MUKHERJEE, SECRETARY DOWR, RD, GR

AFTERNOON - 1:00 PM

HOST: SHRI. YANTHUNGO PATTON, DY CHIEF MINISTER, HOME & BORDER AFFAIRS

CO-HOST: SHRI. TONGPANG OZUKUM, ADVISOR, WATER RESOURCES

CO-HOST: SHRI. P. LONGON, MLA

HONoured GUESTS:

- I. HARINDER BIR SINGH GILL, IRS, ZONAL MEMBER CENTRAL BOARD OF DIRECT TAXES
- II. SM. SUNITA SRIVASTAVA, IRS, PRINCIPAL CHIEF COMMISSIONER OF INCOME TAX, WB & SIKKIM

OFFICIAL MEDIA PARTNER: NCFBTV, SERVO, Toyota, Honda, DIO, etc.

Nagaland Angh-i Viksit Bharat Sankalp Yatra tenzüksü

Dimapur, Luchii/December

01 (TYO): Kohima district nung Viksit Bharat Sankalp Yatra tenzükba temaitü Nagaland Angh, La Ganeshan-i November 30, 2023 nü Raj Bhavan, Kohima nungi Viksit Bharat Sankalp Yatra undang IEC Van flag off süja liasü.

Kohima district atema Viksit Bharat Sankalp Yatra tenzükba sentong ya D. Khel Ground Siekhazou, Kohima nung Kohima District Administration aser sendaktepa aliba department tem lungjemer ayongzüka liasü.

Iba sentong nung Deputy Commissioner, Kohima, Kumar Ramnikant, IAS ajanga jemidang, mapang tatsüka tsünta iba sentong takok ngua ayongzüktetba asoshi Kohima village aser sendaktepa aliba department tem dang pelaba ashi.

Viksit Bharat tetetzü 'developed country' aser Sankalp Yatra tetetzü 'journey with one resolution' ta pai ashi.

Iba sentong ya yimtsüng ajak nung Central Government Schemes agi süngdaktsüba indang lir. Iba atema Central Government nungi IEC Van ya agütsür, kobai district ajunga longa Central Government indang scheme balala nüburtem

nem agütsütsü, ta pai ashi.

Pai iba sentong nung dena alirtem dang ambassador ka-ka akumtsü aser iba sentong indang awareness prokshitsü ayongzük aser nüburtem dang pei kishizüng tonga aruba services agitsü ashi.

Iba sentong tenzükba sülen department aser agency balalai spot service tem agütsütsü. Aser iba mapang Hypertension & Diabetic screening, AB-PMJAY card generation, TB screening by CMO Office Kohima; My Bharat Volunteer Registration by NYK Kohima; PM Ujjwala Registration by IOC Ltd and ADS Kohima; PMMVY Registration by DHEW Kohima aser PMSBY, PMJJBY, APY by All Banks Kohima amala services agütsütsü, ta Kohima DC ajanga ashi.

Kohima Village Council Chairman, Helievio Solo-i sentong nung o tatsüka jemidang, linük ajunga nung amshiba sentong ka Kohima nung tenzükba ya maongka tulu lir, ta ashi.

Kohima district ajunga asoshi Kohima village ya tiyongtsü ama shimeteba asoshi pai Central aser State sorkar dang pelaba ashi aser iba sentong yagi nüngdakbapur

tonga teyari agitsü imlar ta ashi.

Pai line department tem dang sentong takok ngua inyaktettsü asoshi yimtsüng nung ketdangsürtetem den osangtsüsang shidak agiteptsü ayongzüka liasü.

Iba sentong nung Ato Kilonser-i jembiba, Viksit Bharat atema Sankalp (pledge) video aser sorkar indang scheme balala sayua liasü.

Kasa sentong nung Dzüvichünuo Rutsa aser Zelhouneinuo Rame na nem Women Achievers Title agüja liasü.

Dzüvichünuo Rutsa ya Taekwondo Black Belt lir aser 2014-17 atema Nagaland State Level nung Gold Medal angu aser National Level asayamung balala nung state tenüng nung shilem agia liasü.

Zelhouneinuo Rame ya tennis asayar ka lir, shibai Nagaland State aser NE State Level nung medal balala ngua lir aser National Level nunga state tenüng nung shilem agia liasü.

Iba sentong nung menden ya Nodal Officer, Kohima Block, BDO, Celine Thol liasü aser scheme balala kübok tajangzük agirtemi parnok indang otsü lemsatepa liasü.

Jubilee Memorial College nung World AIDS Day amung

Dimapur, Luchii/December

01 (TYO): World AIDS Day nüngtem nung Red Ribbon Club, Jubilee Memorial College, Mokokchung ajanga December 1, 2023 nü "Let Communities Lead" omen senpet sen 1500, 1000 aser 500 nung ajemdaker Slogan

zülutepba sentong ka ayongzüka liasü.

Iba sentong nung kaketsir 11-i shilem agia liasü aser mezüngbuba, tanabuba aser tasembuba jenjang nguteter nem senpet sen 1500, 1000 aser 500 den kulizüng kaket agüja liasü.

Iba tetoktepbba nung mezüngbuba jenjang ya

Vandana Rai-i angu, tanabuba jenjang ya Moamongla Imchen aser tasembuba jenjang ya Akumjungla Imchen aser Tiasunep Aier nunger temi ngua liasü.

Mokokchung nung World AIDS Day amung



Mokokchung nung December 1, 2023 nü World AIDS Day amungdang sentong nung adener ajak külemi tangokba noksa nung angur.

Mokokchung, December/ Luchii 01 (TYO): Alima ajunga den külemi Mokokchung nunga tanü Chief Medical Officer Conference Hall nung District AIDS Prevention Control Unit aser TI NGO's telok ana semptepe World AIDS Day ayongzüka kaogo.

District Tuberculosis Officer & District AIDS Control Officer, Mokokchung, Dr R.Toshimenla Jamir-isa sentong nung jemidang 1981 küm alima ajunga ayim sünga World AIDS Day kodaser tenzük aser joko tangbo alima linüktemi iba tashitak tamajung agi meimchir takum samadaktsütsü ya meshi meshia anenadoktsü asoshi inyakba indang lemsatep.

Dr R.Toshimenla Jamir-isa 1981 küm meimchir dak AIDS tashitak aliba ya puteter kelen million 40 tema süogo, iba tashitak ya aneptsü mokoktetba tashitak saka iba tashitak nungi jenbuabo litettsü, anungji iba tashitak nungi jenbuabo litettsü asoshi nübur tsüngda nung kati ka nem shisatsü agütsütsüla ta ayongzük.

Alima nung World AIDS

NFHRCC ajanga nüburtem dang ayongzüker

Dimapur, Luchii/December

01 (TYO): Nagaland Foot Hill Road Coordination Committee (NFRC) ajanga nüburtem dang, talisa Doyang Bridge, Governor's Camp, Liphanyan anasa alirtem dang Doyang Bridge ya December 20, 2023 tashi shibanga lir ta technical advisory agütsüba nung tashi angatsü ayongzük.

Iba apu yanglubishi mapang asünung two wheelers densema metetdaktsüogo. Danga district tem nungi Merapani leni Doyang apu ya ajanga senzütsü sentong alirtem danga iba sangdong ya süoki ia

Iba atema NFHRCC ajanga RALH aser YAPO dang iba tenokdangba mapa kuma inyaktsü nungloktü aser gari

Post-mortem examination aser jangjatettsü asoshi tasümang ya District Hospital morgue nung yua lir.

Iba nisungba ya long pant sentsü tanak aser tula sentsü temesüng semer liasü. Kibur/kinunger/medemer temi Office-in-Charge, GRPS, Dimapur den mobile number 7085055021 nung tongteprateptsü akok, ta sangdong ka ajanga ashi.



December 01, 2023 nü Dubai nung India tsür telok kati Ato kilonser, Narendra Modi ajurudang tangokba noksa nung angur. World Climate Action Summit nung adentsü atema Modi Dubai-i oa lir.

COP28 senden nung PM Modi-i UN Secy-General, Guterres ajuru

Dubai, Luchii/December 01 (Agencies): Hokolbarnü UAE yimtiba, Dubai nung UN climate summit aliba mapang Ato kilonser, Narendra Modi-i United Nations Secretary-General, Antonio Guterres ajuru aser climate dak sendakba nükjidong balala ataloktsü atema India-i inyakba mapatong balala metedaktsü.

Tena senden tembangba sülen New Delhi nung External Affairs Ministry-i sangdong ka ajanga, "Lenir anati (Modi aser Guterres) Climate Action, rongsenketzung, technology aser UN densema financial institutions dak sendakba nung Global South atema tongtibang onüktem aser tebilemtsü balala lemsatepogo," ta metedaktsü.

UN Secretary-General-i G20 Tir mapang India-i sustainable development, climate action, bank reforms aser Disaster management

atema inyakba asoshi pelaba metedaktsü. UN Secretary-General-isa India G20 Tir asüba mapang inyaktetba mapatem yangertetsü atema India den külemi inyaktsü aser 2024 küm UN Summit nunga benoka jemitsü, ta metedaktsü.

Dubai nung ayongzükba UN Climate Change summit nung Modi-i senden pezü nung jembi aser linük balala nungi lenirtem den jurila senden amen.

Ato kilonser Modi-i UK Ato kilonser Rishi Sunak, Brazil Tir President Luiz Inacio Lula da Silva, Italy Ato kilonser Giorgia Meloni, British Foreign Secretary David Cameron aser taoba mapang UK Ato kilonser, Tony Blair nunger ajuru.

Modi-isa Sri Lanka Tir Ranil Wickremesinghe, Ethiopia Ato kilonser Abiy Ahmed Ali, Bahrain Chuba Hamad bin Isa Al Khalifa, Dubai yimsüsür Sheikh Mohammed bin Rashid Al Maktoum, Uzbekistan Tir

Shavkat Mirziyoyev aser Tajikistan Tir Emomali Rahmon nunger ajuru.

COP28 senden alidangsa Modi-i Jordan Chuba Abdullah II ajuru.

Tesülen pai X ajanga, "Künati onük balala nung o lemtep aser asen linük ana tsüngda tesendaktep tsütsü tera junga yanga aliba jenjang asadang. Maneni linük ana tsüngda tesendaktep tajungba akümtsü yongyaa atar," ta metedaktsü.

Hokolbarnüsa Modi-i Israel Tir, Isaac Herzog ajuruba mapang pa dang ken o jembiba aser yimtenren ajanga tekaraba nung Israel-Palestine ken o bentetsü ayongzük.

Modi-isa October 7 nü kiralongartemi Israel amakdang Israel nunger aika asüba atema tejashi lemsatep aser pua alirtem chiokba atema Israel dang pelaba lemsatep, ta External Affairs Ministry otongdar, Arindam Bagchi-i metedaktsü.

Iba bangzüng pusema India, Bangladesh, Pakistan, Nepal, China, Lebanon, Iran, Iraq aser Indonesia densema linük 91-i vote agütsü. Iba bangzüng anema vote agütsüba linük 8 liasü, aser item linüktemji Australia, United Kingdom, United States, Palau, Micronesia, Israel, Canada aser Marshall Islands li.

November 28 nü UN General Assembly nung iba bangzüng atema vote agütsüba nung shilem magiba linük 62 liasü, aser item linüktem rongnung Ukraine, France, Germany, Denmark, Belgium, Japan, Kenya, Poland, Austria aser Spain densema li.

Cyclone Miachung agi Tamil Nadu kongshitsü

New Delhi, December 01

(Agencies): Hokolbarnü India Meteorological Department (IMD)-i, Bay of Bengal aser South Andaman Sea nung low pressure area ka tenteta yipru mopung tesashi akümtsü aser December 4 nü Tamil Nadu aser Andhra Pradesh nung tzüyimküm atongtsü, ta metedaktsüo.

Met department-i sangdong ka ajanga, low-pressure area ji northwest tsütsüleni aotsü aser Bay of Bengal nung mopung tesashi akümba sülen cyclonic yipru 'Miachaung' akümtsü, ta metedaktsüo.

December 1 nü Andaman & Nicobar Islands nung tzünglu metedaktsüo.



December 01, 2023 nü Singapore nung 'Vibrant Gujarat Global Summit' jakdang Gujarat Chief Minister, Bhupendra-i Singapore Minister for Trade & Industry, Gan Kim Yong den senden amenba sülen tangokba noksa nung angur.

Odisha kübok Paradip port nung sen crore 220 jenjang cocaine apu

New Delhi, December 01

(Agencies): Odisha nung Jagatsinghpur district nung aliba Paradip port nung rong ka nungi sen crore 220 jenjang cocaine mozü puogo, ta Hokolbarnü ketedangsertemi metedaktsü.

Brihostibar aonung Paradip International Cargo Terminal (PICT) nung anena aliba rong ka nung taseptsü 22 nung melung malemtsüsa oset kar angu, ta parnoki metedaktsü.

Crane operator-i ibaji tapoktsü oset ama anguba sülen pai ketedangsertem nem iba osangji metedaktsü. Ibaji tendangba ajanga temesepba mozü 'cocaine' liasü ta jangja. Khu abenba rong 'MV ogo.

IAF-i Tejas tayimtsü 97 aser helicopter 66 angutsü

New Delhi, December 01

(Agencies): Union Defence Ministry-i defence dak sendakba tezungzüktep ka agiogo aser iba tezungzüktep kübok Indian Air Force (IAF) atema raradang amshiba Tejas Light Combat Aircraft (Mark 1A) 97 aser IAF o army tem atema Prachand Combat helicopter 156 angutsü.

Helicopter 156 nungjagi army tem atema helicopter 90 aser IAF atema helicopter 66 asütsü.

Chief of Air Staff Air Chief Marshal VR Chaudhari-i, "Onok ket nung original IOC aser FOC version Light Combat Aircraft 40 lir. Anungji tang ano bendenlokba ajanga tarutsü nung Indian Air Force ket nung

sashia arutsü aser December 2

nungi December 4 tashi Tamil Nadu aser Puducherry nung tzüyimkülen aliba regions nung tzünglu sashia arutsü, ta parnokisa metedaktsü.

December 3 aser December 4 anogotem nung Andhra Pradesh tzüyimkülen tzünglu kanga sashia arutsü, ta IMD-isa metedaktsü.

IMD-i angopurtem dang December 2 tashi southeast Bay of Bengal-i angopui maotsü, December 4 tashi southwest Bay of Bengal-i angopui maotsü aser December 5 tashi westcentral Bay of Bengal-i angopui maotsü tekümdangtsü metedaktsüo.



Patna, December 01, 2023: Tawa Uttarakhand state kübok Uttarkashi district nung tunnel chirepba lendong nungi kümzükertem Jay Prakash Narayan International Airport, Patna tonga arudang Bihar Minister of Labour Resources, Surendra Ram-i parnok agizükba sülen tangokba noksa nung angur.

Debi' ji Egypt nungi apuso aser Indonesia nung aliba Gresik port ajanga Paradip port tonga aruba sülen Denmark-i aotsü sentong liasü.

"Powder amai alibaji cocaine liasü ta jangjaogo. International market nung mozüji sen crore 200 nungi crore 220 jenjang lir," ta state Commissioner of Customs, Madhaab Chandra Mishra-i osangbenertem nem metedaktsü.

Tang tashi nungbo nisung shinga mapu saka rong nung alirtemji pua lir. Iba tatalokba bushisüngdangtsü atema state yimtiba, Bhubaneswar nungi custom team ka Paradip-i ogo.

"Iba tayimtsü ya kanga junger aser iba ya ajanga Indian defence industry tashi itsitsü. Iba ya ajanga 'Aatmanirbhar Bharat' atema nendaka inyakba sayur," ta pai metedaktsü.

Tejas tayimtsü aser Prachand Combat helicopters dak alia Defence Minister Rajnath Singh-i aniba Defence Acquisition Council-isa Indian Air Force indang Su-30 fighter aircraft upgrade programme agizükogo.

Tejas tayimtsü aser Prachand Combat helicopters projects den Su-30 upgrade programme nung sen 1.3 lakh crore shi indoktsü.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUCHII 02, 2023

Yimti mita anüktsüsa kümogo

Mokokchung town nung anogo asem jakdang aonung mejangjatetba nisung pezü AKM lenir ka aliba kidangi arur kidang senotsü ayuba süngden ajak lapokdakja mita reprangba mapa jagi asen lima tensa mejungi kümogo ta sayur. Tia junga iba kidangji senotsüa mali asü aser item mejangjatetba nisungtem jagi kidang alirtem daka tamajungbo kecha meinyak saka aonung manger tejak zübanger kilongi aita ki ajak mita aobaji tebilembe tajungbo masütsü. Parnok jagi iba kidangji yi yua lir ta aija jembi aser yiji bushi saka mangu, kechiyong iba kiji yi ayuba aser ayokba ki masü asü. Ajisüaka, parnoki senotsü rezünge ayuba süngden tashi lapoka bushibaji yi bushir dangbo memesük. Nagaland nung yi yanglutsü aser ayoktsü memelar saka aikati ayoker, anungji excise nung inyaktemi itemji mita bushitsü nüngdaker, ajisüaka Excise purtemibo aonung tejak zübanger süngden tashi lapokdakja yibo mebushitsü, anungji tang Mokokchung yimti nung atalokbaji Excise pur masü, mozü achir mesüra yi jemertemang kar alitsü südi ta temulung melemi bilemer. Asen lima nung tanü asüng yi jemer aser mozü achir kanga züina akümba tebilemtsü ya yi jemer aser mozü achir kibongtem asoshi dang masü saka asenok yimten, lokti aser arogo ajak asoshi tebilemtsü kanga tuluka kümogo. Iba tebilemtsü yagi yi majemer aser mozü machirtem dakang lendong tuluba atalokyonga aotsü ana nung lir. Tang Mokokchung nung atalokbajia yi jemdak mesüra mozü ayokdak atalokba mapa ka masü, iba jagi yi jemba aser mozü achiba tebilemtsü yagi yi majemer aser mozü machirtem dakang tuluba kongshitsü ta angateddaktsüner südi. Aiben asenoki asen aliba lokti nung yi ajemba aser mozü achiba tebilemtsü tulu liaka süoki ia mebilemer, kechiyong item tebilemtsü nung jagi asenbo jembua lir ta asenoki bilemer. Ibayongji, asenoki tangar yi jemer aser mozü achir taküm aser kibongtem indangang shisabolua bilemtsür. Ajisüaka, yi jemer aser mozü achirtem agütsüba timtem aser lendongji parnok kidang masü tang amaji tangar kidangang oa ataloktsü. Aji oda, mozümora achir ka mozü achitsü atema tangar ki kakpoka auyatsü merangdang, ashiko, ki kiburjiang tepseta yutsütsü akok. Kasaji yi jemertem yi ajemtsü atema rakzükratemer kümra yi majemer nisung tajungtem ayip majangtsü aser anüngdanga dena sadema mesenzütetsü. Item ama lendong timtem nungi asenok shinga jenbua mali asünungji, tanü asen lima loktiliba nung yi ajemba aser mozümora achiba tebilemtsü ya asenok ajak tebilemtsü aser khuret asütsüla. Iba tebilemtsü kokteta inyaktsüba nung ya kibong nungi shir yimten, lokti aser arogo ajak kasasa khuret aser teinyaktsü shilem lir. Ajisüaka, item rongnung arogoisa tajungba inyaktetsü. Yimteni item ama rakzükratemerem nungi yimti kümzüka ayutsü atema pei pei mepu aser kiyong nung mitkar yur nüdkaktsütsü akok aser loktii senso shia nem tangatetba tajung agüja azüoktsü merangtsüa akok. Idangji, arogoibo yi jemer aser mozü achirtem taküm aser temang dang masü saka tanelä dena kümzüktsüsa mapa tulu inyaktetsü. Item ama nisung temang aser tanelä kümzükba sentong nung arogoi shilem tulu agitetsüsa arogo nung züngsem ajaki tenla shitak agütsütsüla, kechiyong yi jemer aser mozümora achir taküm melenshidaktsütsü atemaji sarasadem kisüng agi makoktsü, saka sarasadem den parnok temang aser tanelä chiyongtsü agüja mapang tatsükabo anepalutsüsa adoktsü. Parnokji "Life Skilling Center" ama ka nung lidakra taküm melenshidaktsüba den küleme parnok taküm aser kibong mesütsü asoshia mapa ka mesüra ka inyakbosa angazüker aotsüsa training tajung agütsütsüsa akümtü. Mozü achirtem arogo nunger aser yi ajemertemjia arogo nunger, ajisüaka asenok arogoi itemji kümzüktsü memerangra arogoji nisung taküm aser tanelä kümzükba arogo masü saka Construction aser Entertainment Company ama ka dang kümadoktsü. Idangjibo item jagi tenla kidang dena auyatsü.

OLEMSABANG

Alima tensa tiua balala ajurur

S. Nuken Longkumer, Naga United

1838 mapang U.S llima tanak temesüng atema rara dang masü saka ayawara den alikimong agi raktepba aser nisung o nisung na arishitep adokba timtimbaji onsara taku marok ama liasü. Otzü ashiba agi 1838 küm ya America llima tesem aisü nung yamaisa ataloka arubatem angur. Tanü meimchir shirnoki talila aroka belemeyonga ao, reprangang itemji teraksa tali akümba otzü dang liasü. Iba yongji tamangba yimsü nunga tanü tashi teraksa ya tamajungba dang akümer ta aseni angateta arur. Tanü alima ajunga nung tamangba yimsü aser sobaliba indang raktep dang alimaji tepenja tali kümogo. Shiba sgidak, shirnok tai? Mangatetsüsa ken ken mangmangteper, saka Tsüngremi alima yanglur külen ainkar den sayatenya mapa aika sayuadoker, anungji asen meimchir nem tarutsü indang bilemdangtsü asenok nem shisatsü agüja mali. Ita llima tashi aotsü shisatsü agütsüba ajanga meimchirtemi inyaktetogo, teyanglur Tsüngremi ashi, Ni nenok meimchir yangludang ni kong liasü, kechi inyaktsü nenok nisungtem tekolok nung meyanglu? Anungji alima tatempangji shingai memetet. Kodang tempangtsü shinga nem osang agutsüa mali. Tsüngrem o ya ochi lir, ataloka aruba reprangang, kaket zürurtem aser otsü bushirtemi tangatetba balala inyaker aser jembir anungji Yisui ashi kübu Tsüngrem dak alaka shingai memetet ta shiadokogo, nai amangyonga mangmangyonga Tsüngrem o nungdang taküm kibong alima tempangtsü. Iba llima nung aika rsas-a jembia aonunga yiar dang akümtsü, iba sülen takümji tesama tia dang ajurutsü. Tsüngremer mapa ataloka aruogo ano ataloktsü laishiba leni tanaben meyiptü apusoang, takar, tulur, tilar ajaki angateta arutsü, takar tulur sentsüpanga ali yonga Tsüngrem o nungsa tempangtsü meteta lir saka mangateter, Tsüngremi shisarama agütsüra tatempang, otzü shinübaji, aginübaji meimchir shia tepilemba balala lir, item ajak rongnung temeimji talangtiba. Asenoki temeim mapa kar meinyaki lira tesasatsü olura, otzü zülünür masü saka kü mulungjang nung anisüngzük magutsü, tanü Tsüngremer o den asayartem aika misen agi chiogo, tashi mangartem ano achitsü, asenok metet nisung ajak ya künübo asütsübasä, ya teyanglur sendong lir, saka Tsüngrem akümtsürbitem arishi talang yutsür ta amangang, toroto nung anü alutsü ya tesüngmangtsü o lir, süngdong züng nung 'pu' ataloka lir ta ashibaji tiazü masü. Nür rongsen agi timtemer koika yaritetena arishia aliba mapang Khristian tajung? Tsüngremi nür nem moatsüba rongsen kong lir? Ozü agütsüogo yariogo temoatsü, asen atepzüng kong lir? Otzü aika rasa-a aonung tasüngdangba aika arur, alima talangi aotsü ano mapang agitsü kechiba? Naga nungertem aika tezülen jepa lir. Naga llima nüktü yima doktsür bendang llimai ao! Yangji maotsüba ta mangatetsüla, kechiaser aotsübasä, saka takar llima asoshi wadang tulu lir.

Asen llima nungbo dang tashi kecha inyakteta mali tamang tenla dak metaloka lir. Asen atepzüng ken meyipa reprangdangti. Joko par llima renemteter külen pei bendang llima apusoa aotsü asoshi taküm rongsen aser shisatsü ajak renemshir yoker or aor. Dangtashibo asenok takar llima masü. Asen llima nung kecha mali, yanglutsü aruba sen nungi teyari tera anguba rongsentem bendener tangar kin dang sayutsü aoba amai reprangteper, atepzüng nung mapa mali ama, kechiba bileyer aser ariteper ta ashitsü talang aser temsüa lir. Tangari agütsüba rongsen bendanglima endoktsü melena asen llima endoka yanglutsü ta bilema liasü. Tarutsü mapang asoshi anena atadi.


Iba Olemsabang nung lemsaba ken-o aser shisatsü ya iba ocet züli
bilemba ken-o ama tazüngeri angateta agitsü mepishir

AO OSHI ANGAZÜKDAK:
TANÜ ANGAZÜKTSÜBA OJANG
**Sensakpu**

- (n) kangasa sensaker (poverty stricken person)
 * Sensakpu kibongtem nem government-i jang angati agütsür.

Sensaksem

- (v) tebilemba lemsatepa jembitep (conversation, dialogue)
 * Asenok rongnung sensaksem akatsüla.

OLONG PAITEP # 6631**TIPLÉN**

- | | | | |
|--------------------------|-------|-------------------------------|-------|
| 1. Arutsü mela | - (9) | 1. Thinena ao | - (8) |
| 4. Nungja | - (2) | 2. Shilangtsü sün̄g | - (5) |
| 5. Tezü mesangba shiruru | - (5) | 4. Iba yagi aronger | - (2) |
| 7. Ne sasa | - (3) | 6. Amajok | - (4) |
| 9. Alu nung tsük yok | - (4) | 8. Kiset ozü | - (2) |
| 11. Kidong ka tenüng | - (6) | 9. Sün̄grangtsü agi awa | - (5) |
| 14. Yari | - (6) | 10. Tzü teti atsüngdaka aliba | - (8) |
| 15. Pangsemo intok | - (4) | 12. Per tulu | - (4) |
| 17. Tebur oset | - (3) | 13. Shi achiba ozü ka | - (5) |
| 18. Tamangbaren yimya | - (5) | 15. Naga kin ka | - (2) |
| 19. Naga tamaitü shiruru | - (2) | 17. Tsüngsangdang amshiba | |
| 20. Aramesoang | - (9) | oset ka | - (2) |

OLONG PAITEP # 6630 TELANGZÜBA**TIPLÉN :**

- | | |
|--|--|
| 1. Chisang, 4. Ket, 7. Odi, 8. Nangri,
10. Angur, 11. Aiben, 17. Temeim
18. Lah, 19. Moa, 20. Takdang. | LANGTSÜNGLEN :
2. Indang, 3. Nün̄go, 5. Tain, 6. Ana,
9. Ama, 12. Balala, 13. Nao,
14. Sempa, 15. Atem, 16. Ken. |
|--|--|

NAI-A YA METETTER MA

Netherland lima Giethoorn ta ser yimtsüng ka lir aser iba yimtsüngjibo tanga dang nungi khenyongi balaka. Kechiba ta süra iba yimtsüng nungjibo gari lenmang maka. Ki o ki tsüngdaji tzü dang lir asünung, nao mesüra rong ajanga dang parnok senzür aser tesem-tesem nung apu kar lir. Iba yimtsüng tip külen tangokba noksa ka yangi angur.

Assam nung political party 15-i BJP anema asalentong renem

**Dibrugarh, December 1, 2023 (Agencies):**

Assam nung opposition party 15 nungi lennirtem Dibrugarh nung adenshir 2024 Lok Sabha elections atema asalentong yanglutsü senden ka menogo.

Iba conclave ya United Opposition Forum kubok ayongzük aser Congress, Assam Jatiya Parishad, Rajor Dal, Jatiya Dal-Asom, Aam Aadmi Party, TMC, NCP, CPI, CPM,

CPI(ML), RJD, Janata Dal (United), All India Forward Bloc, All Party Hill Leaders Conference o Shiv Sena (UBT) telok nungi lennirtem adenshi.

Dibrugarh nung ayongba political convention nung parnoki 2024 Lok Sabha election atema state-specific common manifesto ka renmogo.

United Opposition Forum Assam (UOFA) ya Indian

National Developmental Inclusive Alliance (INDIA) den putepa tentetogo aser parnokisa iba sentong nung "chargesheet against the BJP" ka renem.

District Library, Dibrugarh nung ayonga agiba convention tanabuba anogo nung United Opposition Forum Assam (UOFA) lennirtemi political party balala nungi züngsemtem aser teshimtet nübotem den ajurutepa jembi.

NSCN(KYA) chairman tenu den PREPAK züngsem 2 apu**Guwahati, December 1, 2023**

(Agencies): Assam nung security forces aser police longjemer NSCN(KYA) züngsem ka aser PREPAK (People's Revolutionary Party of Kangleipak) züngsem ana puogo.

Dibrugarh aser Tinsukia district nung sepaitemi telungpurtem apu.

Osang angazükba agi tanü apuba NSCN (KYA) züngsem ya NSCN (KYA) chairman Yung Aung tenu tanubosang lir. ECIB Assam Police aser 18

Garhwal Rifles kulem telok katı Dibrugarh airport anasa Prepak züngsem ka apu ta Eastern command Intelligence Battalion-i ashi.

Pa dang asüngdanya asüdang Prepak züngsem ka NSCN(KYA) züngsem ka den kulemi Myanmar leni aotsü sentong atongba osang angazük.

Iba osang nung ajemdaker Tinsukiak kubok Jagun tesem nung police-i Prepak züngsem ya NSCN(KYA) züngsem na apu.

NSCN(KYA) cadre ya Marmet Ngaimong ta jangjaogo aser pa ya NSCN (KYA) chairman Yung Aung tenu tanubosang ta osang angazük.

Myanmar nung aliba tedi Yung Aung-i tuyuba ama Marmet-i maparen inyaka aru ta police-i ashi.

Külen, Prepak züngsem ana ya Nongthombam Kabichandram Singh aser Pebam Akash Singh na ta jangjaogo. Nongthombam ya Imphal East aser Pebam ya Imphal West district nungi lir.

Assam nung sorkar ketcangsür 11 mapa nungi anentsü**Guwahati, December 1, 2023 (Agencies):**

Assam Public Service Commission (APSC) nung sen yong mapa ayokba ken o dak sendakba nung sorkar ketcangsür 11 mapa nungi anentsügo.

Ketcangsürtem ya ACS aser APS telemsa nungi lir. Parnok ya Kalyan Kumar Das, Nandini Kakati, Faruk Ahmed, Dipankar Lahkar Dutta, Nitumoni Das, Rumir Timungpi, Kul Pradip Bhattacharya, Nilanjan Gogoi, Analjyoti Das, Shahjahan Sarkar aser Aishwarya Jivan Barua nunger

Hokolbarnü parnok manentsüdang Assam Civil Services (ACS) ketcangsür pezü mapa nungi anenja liasü. Parnokji Additional District Commissioner of Jorhat Akashi Duwarah, Deputy Secretary to the Government of Assam, Indigenous and Tribal Faith & Culture Department Dhrubajyoti

Jain nungertem lir. APSC-i 2013 küm competitive exams agidang parnoki tim masüba leni mapa angu ta asüba agi parnok 11 mapa nungi anentsü.

Assam nung tanü sorkar ketcangsür 15 tashi mapa nungi anentsügo. APSC sen yong mapa ayokba ken o dak sendakba nung sorkari bushisüngdang asüba mapa tenzükshiba sülen temulung malemba ketcangsürtem mapa nungi anenja arur.

Tripura nung nisung 5,269 dak HIV/AIDS keta lir**Agartala, December 1, 2023**

(Agencies): Tripura nung HIV/AIDS aketer nisung 5,269 lir aser parnok rongnung kaketshir 576 dena lir.

Iba osang ya Tripura State AIDS Control Society-i World AIDS Day nung metedaktsü.

October 2023 tashi nung tetsür 1,022, tebur 4,246 aser transgender ka lir ta parnoki ashi.

150-200 dak HIV aliba puteter. Taküm April nungi October tashi nisung 116,318 tendangba nungi parnok 1,111 dak HIV putet.

HIV/AIDS aketer teimba alibaji West district nung lir aser iba district nung nisung 1,594 lir.

Iba sülen Dhalai district nung nisung 906, North District nung 763, Unakoti district nung 415 Khowai district nung 542,

Gomati district nung 412, Sepahijala district nung 334 aser South district nung 238 lir.

October 2023 tashi nung nisung 2,545 injectable drugs ajanga HIV mena ta report nungsia shia lir.

Tripura State AIDS Control Society-i state nung intravenous drug users 5,267 atema Opioid Substitution Therapy services tenzükogo.

Russia-i tayimtsü amshia Donetsk amak, nisung ter yiru

Kyiv, Luchii/December 01 (Agencies): Rara agi kongshir aliba Ukraine anüdoklen tali-tali amakba mapang Russia-i Donetsk nung missile agi amakba mapang nisung ter yiru aser kar mejangjai lir, ta Ukraine ketdangsür temi ashi.

Donetsk nung aliba yimtsüng ishika nung yasüng nungi sangwaziuka amakdang tanur pezü densema nisung ter yiru, ta Ukraine indang Interior Minister Ihor Klymenko-i Brehostibarnü ashi.

Yirur alirtem rongnung kibong ka nungi tanur ana aser ano arishi küm 13 tanur ka densema lir, ta pai ashi.

"Ki o jen raksatsür alidak nisung pongu bushia liasü," ta minister-isa ashi.

Mapang tatsüka lir Donetsk ketdangsür temi ashiba agi, rescuer temi nisung tasüman ka ngutet aser tanur ka densema nisung pezü ki o jen teraksa agi anenbanga lir.

Pokrovsk, Novogrodivka

aser Myrnograd yimtsüngtem nung apartment block ka, njia ki toku, police station ka, gari kar aser gari ayuba tesemtem raksä.

Donetsk nung Russia-i tesashiba raraba mapang iba lendong ya atalok, kong tesem tuluba par kübok lir aser parnoki iba region ajunga agitsü tebilemba lir ta ashir.

Hopta ishika Avidiivka jila nung kanga sashia rara arudagi. Bodhbarnüa Donetsk region kübok Khromove

yimtsüng agiogota Russia-i ashi.

Ukraine ketdangsür temi telangzüba kecha magütsü saka Moscow sepaitem takoksa tulu

ajurur ta shia liasü.

Russia nungeri amakba tali akumer, aser tayimtsü amshia amakba anasü agi tali lir aser armoured vehicles 20 shi Ukraine tsütsüi aiter, ta Ukraine mitkar indang odongtar Oleksandr Shtupun-i shia liasü.

Russia-i Ukraine amak

tenzüker ita 22 buba nung ajemoker saka hopta aika tongpang nung takokba balaka mali. Western allies temi nok-nü aser teyari balala agütsüba nung metaloka aliba Ukraine-i maneni teyari meshir.

"Asenoki manentsüla, asenoki maneni raratsüla. Ukraine-i tamakok nung manentsü," ta Ukraine indang minister of foreign affairs, Dmytro Kuleba-i Brussels nung NATO minister tem Bodhbarnü senden ka amendang ashi.

"Ibai Ukraine security atema kisüng masü, ibai Euro-Atlantic ajunga asoshi lir."

Iba senden nung adensang US Secretary of State Antony Blinken-ia rara matem tashi NATO-i Ukraine yaritsü ta shia liasü.

"Tanü yangi NATO nung telangzüba tejangja aser manokshi lir. Asenoki maneni Ukraine yaritsü," ta Blinken-i ashi.

US-i ano North Korea nem tenokdangba agütsüshiogo

Washington, Luchii/December 1 (Agencies): North Korea-i taoba hopta spy satellite ka yokba sülen United States-i Brehostibarnü North nem tenokdangba tasen agütsüogo. Tenokdangba ya bendanglen amenoka aliba agent tem nem agütsüogo, shirnoki North nem teyari agütsüogo.

U.S. Treasury Department-i sangdong ka ajanga ashiba agi, parnoki cyber espionage group Kimsuky nem tenokdangba agütsüogo. Iba telok yagi North Korea indang strategic aser nuclear dak sendakba nung inyakyim tem nongita yaritsü atema itangiter osang bendena liasü.

North Korea-i taoba hopta parnok indang mezüngbuba reconnaissance satellite takok ngua yokba sülen Brehostibarnü tenokdangba agütsüba ya Australia, Japan aser Korea den tongteprateper agütsüogo. North-i ashiba agi iba satellite ya US aser South Korea nunger sepaitem senzüsenpong meita atatsü asoshi design süa yangluba lir.

"Tanü United States, Australia, Japan, aser Republic of Korea-i agiba jenjang ajanga Pyongyang-i özüng alema mepetmesü adokdaktsüsi atema inyaksangshiba anema longjemer nokdakba sayur," ta Treasury indang Under Secretary for Terrorism and Financial Intelligence, Brian Nelson-i ashi.

"DPRK-i özüng alema rongsen bendenba aser prangbong injang aser hadir balala tali kuma aoba dak sendakba nung tongtibang

tesendakteptem dak maneni rangloker inyaktsü," ta Nelson-i North Korea indang official tenüng Democratic People's Republic of Korea amshia jembia liasü.

New York nung United Nations dangi North Korea indang mission-i Brehostibarnü tenokdangba agütsüba dak sendakba nung kecha telangzüba magütsü.

Satellite yokba sülen North Korea-i ashiba agi, parnok lenir Kim Jong Un-i, White House, Pentagon aser Norfolk naval base nung U.S. aircraft carrier tem indang spy satellite yagi tangokba noksatem asadangogo. North indang state media sangdong ajangsa, Satellite yagi Washington densema South Korea, Guam, aser Italy nung yimtitem aser military base tem indang noksa tangokgo, ta metedaktsü.

Hombarnü United States aser North Korea indang United Nations ambassador tem satellite yokba aser tensa mejungi akumba dak sendakba nung Security Council nung mangattep adokogo.

Brehostibarnü tenokdangba agütsüba sülen tenokdangba agütsürem indang US nung aliba rongsen ajak mamshidaktsüsi asoshi sota yuogo aser America nungertem item nisung aser lokti tentettem den inyaksangshi masütsü tenokdangba agütsüogo. Shirnoki parnok den inyaksangshidir parnok nema tenokdangba agütsüsi ana nung lir.

Treasury-i ashiba agi, Kimsuky-i mezüngbo Europe, Japan, Russia, South Korea

aser United States nung sorkar, research center, academic institution aser tanga mapa balala nung inyakertem dak rangloker inyaksangshir.

2020 küm October ita U.S. Cybersecurity and Infrastructure Agency (CISA)-i, iba telok nem North Korea-i alima ajunga nung itangiter osang bendentsü asoshi nongloktsüogo, ta ashi.

Securiy and Infrastructure Agency (CISA)-i, iba telok nem North Korea-i alima ajunga nung itangiter osang bendentsü asoshi nongloktsüogo, ta ashi. Kimsuky inyakyim ya South Korea, Japan aser United States dak rangloker inyaksangshia arudar.

June ita U.S. National Security Agency-i ashiba agi, hacker tem shirnok 2012 küm nungi inyaksangshia arudar parnok ya North Korea indang Reconnaissance General Bureau (RGB) den sendaktepe lir. RGB ya North Korea indang intelligence agency ka lir, shirnok cyber warfare inyakyim nung densema lir.

Brehostibarnü tenokdangba agütsüba nung Iran aser Chan nung amendaker aliba U.S. aser UN-designated Green Pine representatives tem densema lir. Treasury-i ashiba agi, North nem prangbong injang aser hadir balala aser iba dak sendaka aliba osettem tesadang kabu iba telok yagi agütsü.

Maneni Russia nung amendaker aliba North Korea indang bank representatives ana aser China nung amendaker ana representative ka nema tenokdangba agütsüogo.

JANGPETKONG SENSO TELUNGJEM DIMAPUR

IN AID OF COMMERCIAL BUILDING CONSTRUCTION

DATE OF DRAW : DECEMBER 1, 2023

VENUE : SALT CHRISTIAN COLLEGE
POLICE COLONY, DIMAPUR

WINNING TICKET NUMBERS :

	SERIES NO.	SERIAL NO.
1st PRIZE	06	0041
2nd PRIZE	18	0923
3rd PRIZE	11	0287
4th PRIZE	07	0569
5th PRIZE	A. B. C. D. E.	0165 0027 0645 0617 0523

Terms & Conditions

- The winner should claim their winning prize within Seven (7) Days from the date of draw.
- Winners must produce the original tickets while claiming the prizes. Torn and mutilated tickets will not be entertained.
- Contact No. : +91 7005289661 / +91 9612057918

Israel-i maneni Gaza nung tayimtsü amshia amak tenzüker

Gaza City, Luchii/December 01 (Agencies): Rara anena ataba mapang atsülangtsü merangba nung tamakok ajuruba sülen Israel mitkar temi

Hamas anema operation tenzüka Gaza Strip tesem ajungalen rara tenzükogo.

Hopta ka junga rara anena ataba mapang atemba sülen hokulbarne 7:00 ako meta nungi rara maneni tenzük.

Israel-i tayimtsü amshia Gaza Strip tesem ajungalen amakba osang lir aser iba tesem south tsütsüa amakba osang lir, koba taoba mapang civilian tem jena aotsü asoshi tesem tajung ka liasü.

Hokulbarne nungi tenzüka tanaben Gaza Strip amakdang Palestine nunger nisung 54 tepletba aser aika yiruba osang Gaza indang health ministry ajanga sangdongogo.

Khen asoshi rara anena ataba mapang tatem kati arutsü ghonda ka shi lia rockets khaloktsüba aser prangbong ola angashia liasü. Hamas-i iba tezungzüktep nung aibelen asü, ta Israel-i ashir.

Rara anena ataba mapang atsülangtsü asoshi maneni jembishinür. Israel aser Hamas telok tetsüngtai ia yimzung asoshi jembiba Qatar nungi osang kecha agüja mali saka

Qatar aser Egyptian mediators tsünta maneni jembishinür ta osang angashir.

"Rara anena ataba inyakyim nung Hamas-i aibelen asü, aser iba den külemi Israel tsütsüi injang khaloktsü. IDF-i Gaza nung Hamas kiralongrar telok anema rara tanaben tenzükogo," ta Israel army ajanga Hokulbarne X nung post asü.

Hamas-i pua alirtem maneni chioktsü memulung aser rara anena ataba temzüng nung aibeler, ta Israel Ato Kilonser Benjamin Netanyahu-i ashir. Hamas-i ano telangzüba magütsü.

"Rara tanaben tenzükba mapang Israel sorkari iba rara indang nükjidong - pua alirtem chioktsü, Hamas samatsütsü

aser Israel nung alirtem asoshi Gaza ya kodanga timtem ka masütsü - tongtettsüa inyaktsü," ta Netanyahu indang office ajanga ashi.

"Khen asoshi rara manendang anogo 50 nung Israel-i makokba ya rara anena ataba tembangera makoktsü," ta Hamas-i sangdong ka nung ashi.

Nüburtem tesem balala nungi ainshitsü metedaktsüba ajanga Israel-i Gaza Strip south tsütsü amaktsü sentong aliba angateter. Khen asoshi rara manendang Gaza Strip north tsütsü timba bomb poklokja liasü.

November 24 nü nungi tenet rara anena atadang Gaza nung pua alir nisung aika chiok aser iba melen Palestine nunger tepuokdak alira aika chioka liasü.

Anogo tenet rara anena alidang Hamas-i pua aliba nisung 110 chiok aser yangji Israel nunger nisung 80 liasü. Iba yong Israel-ia Palestine nunger tetsür aser tanurtem densema nisung 240 chioka liasü, aser item ya aika taitsüba makai ita aika administrative detention nung liasü.

Ajisüaka kasa mapang Israel-i occupied West Bank aser East Jerusalem nung Palestine nunger aika pua liasü.

Gaza nung nisung million 2.3 atema peria mesüaka iba mapang kanga nüngdaka aliba chiyongtsü, tajemtsü tzü, mozü aser totzü agüja liasü.

Israel sorkar indang odongtar Eylon Levy-i osangbener dang ashiba agi, rara metenzükdang samaba nisung pezü densema Hamas-i nisung 137 mechioi yua lir.

Item rongnung arishi küm pezü aser ita ter tanur ana lir, saka Hamas-i tanur ana ya süöga ta ashir.

Gaza nung mechioi pua alirtem ya tebur 117 aser tetsür 20 lir aser parnok rongnung Israel nunger 126 aser bendanger 11 lir.

Northeast Invitational Badminton Tournament Dec 12-15 tashi Mkg nung asayatsü



MDBA-i ayonga Li Ning Northeast Invitational Badminton Tournament dak sentakba nung osangbener senden ka MDBA, Stadium nung akadang tangokba noksa nung angur. Mokokchung, 1st December, 2023.

Mokokchung, Dec. 01, 2023 nüngdaker, anungji, iba dak (TYO): Mokokchung district asoshi otsütsüsa 'Li Ning Northeast Invitational Badminton Tournament 2023' yangi MDBA Stadium, Mokokchung nung tan Dec ita 12-15 tashi asayatsü sentong renemdaki ta Dec 1 nü Mokokchung District Badminton Association ketcangsürtemi parnok office nung osangbenertem den jembidang metedaktsü.

Iba asayamung ya Nagaland Badminton Association aser Mokokchung District Sports Council (MDSC) na aküm nung MDBA-i ayonga akar. Mokokchung nungbo iba asayamung ya mezüng süa ayonger.

Iba asayamung ya tongtibangsa tetoktebpa ka dang masü saka Mokokchung nung badminton asaya nüngtugu kümdaktsüba den külemi MDBA indang mangdang 2040 atalokdaktsüba nung yaritsü nükjidong yur taküm iba asayamung ya yangi ayonger, ta organizing committee, convener, Lipok Jamiri metedaktsü.

MDA mangdang 2040 dak rangloker MDBA-i mapangaben district level, inter-club, inter-school tournament, coaching balala ayonga arur. Iba den ano Mokokchung nung badminton riju akatsü

sentakba nung tang maparen balala teinyakdak lir aser sangküm küm nungibo tebangmung kabotkümtettsü imlar, ta Lipokisa ash. Asayamung dak sentakba nung maparen balala mazüngi inyakdaki, aji oda, district administration-i anir 12 Assam Rifle-temia renemshiba mapa balala nung yaritepdaki, anungji, parnok ajak dang pelar, ta Convener-isa ash.

Badminton ya asenok asoshi tapet asaya ka lir, taoba mapanga Mokokchung nung Moarenlai International tournament nung India tenüng nung shilem agia lir, anungji, mangdang 2040 tashi nungbo Mokokchung nung Olympic nung shilem agir adokdaktsütsü merangtsü, anungji, iba mangdang atalokba nung asenok ajak shilem agir kaka asütsü ayongzüker, ta paisa shisem.

Iba asayamung nung northeast region kubok Badminton Association of Assam, Arunachal Pradesh, Manipur, Meghalaya, Mizoram, Sikkim aser Tripura ta association ajak dangi tejaokba shiti yokogo, item rongnung state karibo arutsü osang agütsügo aser ano kar nungi osang maru lir, ta tayongteremisa metedaktsü.

Iba asayamung ya Mokokchung nungbo mezüngbuba ayonger aser ibai asenok asoshi maongka, anungji, iba asayamung takok angutsü asoshi nübur ajaki amalitebpa den akokba ajak nung nungita yaridaktsünür, ta MDBA ketdangsürtemisa mepishia ayongzük.

Iba asayamung nung asaya telesma trok (6) alitsü, itemji - Women's Doubles, Men's Doubles, Men's 75+ Doubles, Men's 85+ Doubles, Men's 95+ Doubles aser Men's 105+ Doubles ta alitsü. Asaya telesma ajak nung takoker mezüngbuba (winner) nem senpet sen 25,000/- aser atongdakba (runner up) nem 15,000/- agütsütsü. Jangratemtsü osang kajib asayamung nung match shia takoker nem senpet sen agütsütsü, ta tayongteremisa metedaktsü.

Asayamung mapang badminton sayir nüngtugu asayar kar jaoka shisatokden akaba den exhibition match kar alitsü sentong lir. Asayamung mapang stadium kima chiyungtsü balala angudak food court-tem lapoktsü. Li Ning Northeast Invitational Badminton Tournament ya Nagaland Badminton Association tenzüker küm 50 ajungba nüngtem nung ayonga akar.

Vijay Merchant Trophy atema Nagaland team sangdongogo

Dimapur, Luchii/December 1 (TYO): Nagaland Cricket Association-i Vijay Merchant Trophy 2023-24 atema Nagaland team sangdongogo.

Iba asayamung Plate Group asayatem ajak Cuttack nung asayatsü.

Vijay Merchant Trophy atema Nagaland team nungi asayartem:-

- Shyerinlo Thong (Captain)
- Aloto Sumi (Vice Captain)
- Salangdanga

Longkumer
4. Medempok Pongan
5. Yangselong
6. Solomon Ahunshi
7. Mharenthung Z Lotha
8. Sungjemmongba
9. Yashimeren Jamir
10. Vizoletuo Zhale
11. Akash Augrahari
12. Amit Marak
13. Olemjung Ozukum
14. Tachuye Trakha
15. Bendangsangba Aier
16. Monesor Basumatary
17. Dipanshu Sah

Support Staff:

- Talikaba : Team Manager
- Nehal Ahmed : Head Coach
- Hayithung : S&C Coach
- Duvo Ruho : Physio

Fixture

- | | |
|-------------------------|-----------------------|
| 1st - 3rd Dec. 2023 : | Nagaland vs Arunachal |
| 6th - 8th Dec. 2023 : | Nagaland vs Meghalaya |
| 11th - 13th Dec. 2023 : | Nagaland vs Manipur |
| 16th - 18th Dec. 2023 : | Nagaland vs Sikkim |
| 21st - 23rd Dec. 2023 : | Nagaland vs Mizoram. |

Taoba mapang Atletico & Brazil defender Felipe Luis asaya nungi anentsü

Luchii/December 1, 2023

(Agencies): Taoba mapang Brazil, Atletico Madrid aser Chelsea defender Filipe Luis-i pa tang asaya aliba season tembangba sülen asaya nungi anentsü ta metedaktsü. Iba tetezü pa Deobarnü Maracana Stadium nung Flamengo nungi tatembangbuba asayatsü.

Taküm aiben yiruba sülen arishi küm 38 tain left back yagi iba telemetebta agia liasü.

Club indang social media channel tem nung lemsatebpa video ka ajanga Luis-i ashiba agi, pai arishi küm 45 tashi asayanü liasü saka tia maka aji takoktsü masü. Pa tatembangbuba asaya ya Brazilian league nung Cuiabá den asayatsü akok.

Flamengo pur tatembangbuba round tongteta asayamung akoktsü asoshi maongka lira Luis, Sao Paulo nunga asaya ka nung shilem agitsü akok. Rio de Janeiro nung amendaker aliba club ya tang pezübuba nung lir aser parnok temaba jenjang nung aliba team Palmeiras dang nungi point asem agi tajemba lir.

"Ni temaba jenjang nung masayatetra asaya nungi anentsü ta nangzüker liasü. Flamengo pur parnok jenjang den peta asayar ka nüngdaker, shibai küm ka nung asaya 70 asayateta team nung mezüngbuba asayatsü atema

raretetba asayar ka langa lir. Ni Flamengo nungi asayatsü atema Brazil-i meyipa aru aser ni Flamengo nungi masayateter asünung ni asaya nungi anenba tajungba," ta pai ash.

Luis-i, pa asaya nungi anenba sülen coach mesüra team executive ka ama inyaktsü ta shia aruogo.

Luis ya 2003 küm Brazil indang club Figueirense nungi pa indang professional career tenzük. Pa Real Madrid Castilla nungi tatsüka asaya aser iba sülen 2006 küm Deportivo La Coruña-i oa aser 2010 küm Atletico Madrid-i oa liasü.

Pa Colchoneros nung mezung season pongu asaya aser iba sülen 2014 küm Chelsea-i oa season ka asaya aser ano Atletico Madrid-i meyipa ao. Luis ya 2019 küm nungi Flamengo nung asaya liasü.

Atletico Madrid nungi asayaba mapang Luis-i Europa League anaben aser 2013 küm Spanish League kokogo. Pa Chelsea nungi küm ka asayaba mapang Spanish League koka liasü.

Luis asayaba mapang Flamengo-i, 2019 aser 2022 küm Copa Libertadores kokogo aser paisa Brazil league anaben kokogo.

Maneni pa Brazil team nungi 2018 World Cup asayaogo aser 2019 Copa America kokogo.

2024 T20 World Cup atema Uganda team qualify süogo

Luchii/December 1, 2023

(Agencies): Africa leg qualifiers tatembangbuba round asaya nung Rwanda akokba sülen Uganda team-i otsü tasen ka yanglua 2024 men's T20 World Cup atema qualify süogo.

Qualifiers nung asaya trok nungi pongu akokba sülen Uganda team T20 World Cup Africa Region Qualifier nung temaba jenjang nung tembangogo aser T20 World Cup 2024 atema qualify süogo, koba West Indies aser USA nung asayatsü lir.

Iba takok tajung ngutetba sülen Uganda team tang mezüngbuba ICC World Cup ka nung shilem agitsü aser iba ajanga international cricket nung parnok kanga kara renloka aoba sayur.

Uganda-i Deobarnü wicket pongu agi Zimbabwe koka liasü, koba T20 international asaya ka nung Full Member team ka

Namibia-a African qualifying ajanga qualify süogo aser parnok Oman, Nepal, Papua New Guinea aser Canada den densemogo. United States-a host linük asüba agi qualify süogo.

Uganda ya 1998 küm nungi ICC indang associate züngsem lir saka parnok Test mesüra ODI asayatsü asoshi jenjang monguteti lir.

BILEMDANGANG

"Teyazü jembia nisung ka peladaktsüba dang nungibo ochi ashiba tajungba."